

Biba Cultura ta e proyecto nobo di fundacion AVI



ORANJESTAD- Biba Cultura ta un movimiento cultural Arubano, crea pa fortifica y promove nos herencia cultura. Esaki ta fundacion AVI su ultimo proyecto, e

fundacion ta conoci pa su proyectonan cinematografico cu a yega di gana premionan riba nivel nacional y internacional entre otro 10 Ave Maria, Awa Brak y Abo So.



Durante su 3 aña di existencia fundacion AVI a duna na mas di 300 participante tayernan riba e tereno di cine, television, musica, canto, baile y actuacion. Na 2013 AVI a realisa su proyecto multi disciplinario Tribi Soña cu tabata consisti di tayernan gratis pa e participantenan. E proyectonan hopi biaha ta costoso y AVI no ta logra ricibi suficiente sosten financiero pa

por sigui realisa mas proyecto cultural y educativo.

Biba Cultura ta e ultimo proyecto y tur hoben por participa gratis na e proyecto danki na e sosten di Unoca. E prome proyecto di Biba Cultura ta 'Biba Himno y Bandera', pa medio di arte audiovisual y diseño grafico participantenan lo crea conceptonan pa yuda promove nos dia di Himno y Bandera.

Tayernan lo tuma luga na Scol di Arte na San Nicolas y lo ta riba diasabra 1, 8, 15 y 22 di februari. Orario ta di 10.30 di mainta te 12.00 di merdia. Pa inscribi por bishita www.bibacultura.com, tur persona por participa, pero hobennan tin preferencia. Tambe participantenan por aplica pa e otro proyectonan pa promove nos cultura e.o. dia di San Juan, dande y specialmente nos idioma Papiamentu. □